

Regional News Unit AIR Aizawl
Monday, March 10, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Vawiin Assembly inkhawmah “The Mizoram Liquor (Prohibition) Amendment Bill, 2025.” Putluh a ni dawn.
- Mizoram sum thawhchhuah - GSDP chu za zela 11.6 pung tura chhut a ni.
- ICC Champions Trophy final-ah nizan khan India chuan New Zealand hnehin a tum thum nan an champion.
- Parliament Budget Session thawh hnihna chu vawiih TAN a ni dawn.

<><><>

ASSEMBLY SESSION

Vawiin hian Assembly inkhawmah excise & taxation minister Pu Lalnghinglova Hmar chuan “The Mizoram Liquor (Prohibition) Amendment Bill, 2025.” chu a pulut dawn a, budget chungchang a tlangpui-a sawihona-in a zui ang.

Ni 3 chhung zet an chawlh hnu-ah Mizoram assembly inkhawm chu vawiin chawhma dar 10 leh a chanve-ah chhunzawm a ni dawn a zawhna leh chhanna hun darkar khat chung hman a nih hnu-ah sawi hlawh tak MLP Act 2019 siam danglam tura rawtna bill chu Pu Lalnghinglova Hmar-in a pulut anga, sawiho a ni ang. Hemi chungchanga Excise & Narcotics department lam atanga thu dawn danin Mizorama thei, buh leh bal leh thlai thar chhuah atanga wine leh beer siamchhuah a nih theihna atan dan dinglai hi siamthat a her rem tum a ni. Mizoram thar chhuahah hian grape chauh ni lo, balhla, lakhuihthei, sawhthing, dragon fruit, sapthei, Zobuh leh thil dang wine leh beer siam theihna ang chi atanga siam phalna atan dan hi siam that tum a ni a. Mizoram thar atang chauhva siam theih tura ruahman a ni a. Hei hian Mizoram pawna wine leh beer siam lakluh phalna a huam dawn lo a ni. Hetih lai hian horticulture minister Prof. Lalnilawma chuan Mizoram thei, buh leh bal leh thlai thar atanga ramdanga hralh chhuah (export) tlak tur wine siam chhuak tura ruahmanna an kalpui thu February ni 28 khan a lo sawi tawh bawk a ni.

MLP Act, 2019 siamthatna tur bill hi kar kalta Ningani a minister-in a putluh tura dah a ni vek tawh chungin kohhran lamin an sawisel ni a sawi, zupui leh zutuitling tih chu bill duan chhina paih a nih leh tak avangin MLA-te sem that leh a ni a. Eptu hruaitu Pu Lalchhandama Ralte leh MLA dang pahnih Dr. K. Beichhua leh Pu C. Ngunlianchunga te chuan lo zir chianna hun pe tur leh putluh hun hi tikhawtlai tura an ngenna ngaihtuahin speaker Pu Lalbiakzama chuan house leader Pu Lalduhoma leh parliamentary affairs minister a rawn hnu-ah a hun hi a sawn ta a ni. Hei bakah hian Chief Minister Pu Lalduhoma'n assembly a a putluh, tangka kum thara hman tur Mizoram budget (2025-2026) a tlangpui a sawihona tan a ni dawn a ni.

<><><>

MIZORAM ECONOMY

Mizoram sum thawhchhuah (gross state domestic product - GSDP) chu za zela 11.6 pung tura chhut a ni a, hmasawnna hi chak takin a kal niin Economic Survey 2024-2025 chuan a tarlang.

Nilaini kal ta a finance changtu chief minister Pu Lalduhoma'n Assembly a a pharh Economic Survey-ah hian kum 2023-24 tangka kum chhunga Mizoram thawhchhuah thanna hi a vai-in za zela 9.89 ni tura chhut a ni bawh a. Buh leh bal leh thlai thar chhuah lam agriculture & allied sector) a sum lakluh a pung a, thil siamchhuahna lam (industry)-ah a pung bawh a. Buh leh bal leh thlai thar chhuahin Mizoram sum thawhchhuah a a tum ve zat chu 2024-2025 tangka kum chhung khan za zela 20 point 55 a ni a, a hma kum khan za a 20 point 45 a chhut a ni. Thil siamchhuahna lamin sum thawhchhuah a a thawhve zat chu za zela 32 point 68 atangin za a 34 point 21-ah a pung chho dawrh a. Sorkar hnathawk, hotel leh service dang dang thawhchhuah hi za zela 46 point 87 atangin za a45 point 24 in a tlahniam chungin sumdawnna leh zinmite hnen atanga sum lakluh a pung nasa tho niin Economic Survey chuan a tarlang a ni.

Mizorama mitinin kum khata an thawhchhuah zat (per capita income) hi kum 2023-24 tangka kum chhung khan cheng nuai 2, sing 4 sang 6, 287 a ni a. A hma tangka kum chhung khan cheng nuai 2, sing 1, sang 5 leh 144 a ni thung a, a punna hi a tha thawkhata ngaih a ni chungin pawisa hlutna hniam zel chhut chuan a punna hi chuti lutukin a sang lova ngaih a ni.

He tiang a nih lai hian economics lam mithiamte chuan Mizoram a mi tam ber eizawnna thlawhhma lak a thawhchhuah hi a la tlem avangin Mizoram sum thawhchhuah dan dinhmun hi a la tha tawh lo niin an sawi thung a ni.

<><><>

DEAD BODIES

Social Welfare, Tribal Affairs, Women & Child Development minister Pi Lalrinpuii chuan sorkarin mitthi ruang phurh chu nikum September ni 1 atanga kalpuiin kumin February ni 17 thleng khan mitthi ruang 369 phurh a nih tawh thu Assembly a hrilh.

MNF member Pu Lalchhandama Ralte zawhna ziaka chhangin Pi Lalrinpuii chuan mitthi ruang 369 phurh man hi cheng nuai 36, sing 6, sang 7 leh 18/- dawn tawh a nih thu a sawi a. Mitthi ruang 320 phurh man cheng nuai 31, sing 4, sang 8, leh 314 pek chhuah tawh a nih thu leh ruang 49 phurh man cheng nuai 5, sing 1, sang 8 leh 704 pek tura ruahman mek a nih thu a sawi a ni.

<><><>

BAPTIST CHURCH

Mizoram Baptist Kohhran chuan Mizoram Kohhran Hruaitute Committee (MKHC) atanga inhnudawh an rel a, Mizoram People's Forum (MPF) a tel tura sawmna pawh an hnawl rih.

Mizoram Baptist Kohhran rorelna sang ber Assembly vawi 129-na a rorelna-ah chuan Council of Churches in Mizoram (CCM) chu nikum October ni 27-a alo din takah chuan CCM Executive Committee December ni 20-a thukhawm chuan CCM-a member kohhran 9 te chu MKHC-ah tel chhunzawm tawh lo mai ni se, tiin rawtna a siam a, chu an rawtna chu kumin January ni 28-a Administrative

Committee thukhawm chuan ngaihtuahin tha a ti a. Hei hi Assembly-ah ngaihtuahin pawm a ni ta a ni. Hetih lai hian MPF a tel ve tura sawmna chu Assembly palaite'n an ngaihtuah hnu-ah tun dinhmunah chuan la tel rih loh ni se an ti bawk. Sapupa leh Pu Buanga te Mizoram chhim chan lam an lo thlen ni, March ni 8 chu Kohhrante'n hlung zawk a hman ni se ti a rawtna pawh Assembly chuan a pawm a ni.

An thurel dangah chuan Mizote kan pun chak loh avangin Fa nei tam tur a inzirtir ni se tih a ni bawk a. Mizote an tlem zel chuan sakhuana-ah pawh nghawng a nei thei niin a lang tih tarlan a ni a. Mizorama ruihhlo leh HIV/AIDS, eirukna leh khawtlang sualna hrang hrang do turin tualchhung kohhran tinah a dotu Committee din tura ngen ni se tih te a tel. He tih lai hian Baptist kohhran Pastor pension tawh te Political Party-ah thuk taka inhnawmawih lo tur a ngen ni se tih erawh pawm a ni lova. Agenda-ah chuan Mizorama Political party hrang hrang te kalphung leh inrelbawl dan en hian Ram leh hnam siamthat tuma din leh inenkawl ni a an sawi lai hian mipui beisei leh duh dan erawh an pha lo vek niin a lang an ti.

Mizo tawng hman dik leh Mizo tawng hman uar kawng a BCM pumpui huapa hmalak rawtna pawm a ni a, hemi pual hian March ni 15 khian BCM Hall Serkawnah hun hman a ni dawn a, Kohhran chanchinbu enkawltu te pawh koh an ni.

Tangka kumthar budget -ah cheng vaibelchhe 132, nuai 74, sing 5 leh sang 6 pawm a ni a. a hmuhna tur hi Kohhran thawhlawm atangin cheng vaibelchhe 91, nuai 27, sing 9 leh sang 3 leh Kohhran Department hrang hrang thawhchhuah tur cheng vaibelchhe 41, nuai 46, sing 6 leh sang 3 niin a punna hi cheng Nuai 708 thelh a ni a, za zela 5 point 63 in a pung a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ICC

ICC Champions Trophy final-ah nizan khan India chuan New Zealand hnehin a tum thum nan an champion.

SFX

Dubai-a final inkhelah hian New Zealand chuan vaw hmasain run 251 an siam a. India chuan over khat la awmah chak na tura an mamawh run hi an khum thei a ni.

SFX

India cricket team te hian ICC Champions Trophy kum 2002 leh 2013 ah te an lo la tawh a ni.

SFX

President Droupadi Murmu, Prime Minister Narendra Modia leh Union I&B Minister Ashwini Vaishnaw te chuan India Cricket Team te chu an hlawhtlinnaah an lawmpui thu an sawi a. President Murmu-i chuan India team te chu vawi 3 champion thei awmchhun an ni chu ropui atih thu a sawi.

<><><>

PARLIAMENT

Parliament Budget Session thawh hnihna chu vawiih tan a ni dawn. Tun tum Session thawh hnihna hi April ni 4 thleng neih turin tum 20 an thu dawn a. Union Finance Minister Nirmala Sitharaman chuan vawiin vek hian Manipur budget house dawhkanah a pharh dawn bawk a. Thla hmasaa Chief Minister N Biren Singh a ban avangin Manipur hi President's rule hnuaiah a awm mek a ni.

<><><>

NIHFW

Union Health Minister JP Nadda chuan mi zawng zawng tana inenkawlna tha pek chu an tum ber anih thu leh ramchhunga damdawiinte tihchangtlun zel an tum thu a sawi. nimina National Institute of Health and Family Welfare-NIHFW Annual Day vawi 48-naah he thu hi sawiin Pu Nadda chuan NIHFW chu ramchhunga damdawi lama thawkte chher kawngahte, zirbingna lamah leh thiaman tihpun kawngah an thawk tha hle tih a sawi a ni. Union Minister of State for Health and Family Welfare Anupriya Patel pawhin thusawiin mipui vantlang hriselna lamah ramn bung thar a kai mek tih a sawi a ni.

<><><>